

दिनांक : 28.03.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कह्यो-वां रा राज मांय विकसित भारत बणावण सारु नुवो बुनियादी ढांचो बणावण बाबत् जबरदस्त निवेश।
- मुख्यमंत्री भजनलाल शर्मा सगळा ज़िला कलेक्टरां सागे वीडियो कॉन्फ्रेंसिंग रे जरिए मीटिंग कर र रसोई गैस रा हालात रो जायजो लीनो- कालाबाज़ारी अर जमाखोरी रे खिलाफ करडी कार्रवाई रा हुकम दीना।
- राज्यपाल हरिभाऊ बागडे विद्यार्थियां ऊं भारत री जूनी ज्ञान परम्परा ऊं जुड़ र देश रो माथो ऊंचो करण बाबत् कह्यो।
- प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेला।

प्रधानमंत्री नरेन्द्र मोदी कह्यो है के वां रा राज मांय विकसित भारत बणावण सारु नुवो बुनियादी ढांचो विकसित करण मांय खूब निवेश कर रही है। वे आज उत्तरप्रदेश रा गौतम बुद्ध नगर ज़िला रा जेवर मांय नोएडा अंतरराष्ट्रीय हवाई अड्डा रा पैला दौर रा उद्घाटन जळसा मांय बोल रह्या हा। श्री मोदी कह्यो के लारला ग्यारह साल मांय बुनियादी ढांचा विकास सारु बजट मांय छह गुणा ऊं बत्ती बधोतरी करी ज्यी है।

.....  
आतूणी एशिया मांय उपजा हालात रो जिकर करता थकां श्री मोदी जनता ऊं ई संकट रो सामो शांत मन अर धीरज ऊं करण री अपील कीनी।

.....  
मुख्यमंत्री भजनलाल शर्मा प्रदेश मांय रसोई गैस री कालाबाज़ारी अर जमाखोरी रे खिलाफ करडी कानूनी कार्रवाई करण रा हुकम दीना है। श्री शर्मा आज वीडियो कॉन्फ्रेंसिंग रे जरिए राज्य रा सगळा ज़िलां रा कलेक्टरां सागे रसोई गैस र हालात री जाणकारी ले रह्या हा। वे अहलकारां ने जमीनी हालात री जाणकारी करण अर गैस री पूर्ति माथे निगरानी करण रा हुकम दीना। मुख्यमंत्री अहलकारां ऊं जनता ने रसोई गैस री टेम सर पूर्ति तैय करण माथे खास ध्यान देवण सारु कह्यो।

उपमुख्यमंत्री दिया कुमारी कह्यो है के छपाई उद्योग राज्य री माली व्यवस्था रो खास हिस्सो है। वे आज जयपुर मांय राख्यी ज्यी 'नेशनल प्रिंटिंग एक्सपो-2026' मांय बोल रही ही। दिया कुमारी कह्यो के नुवी तकनीक काम ले र ई हलकां ने और मज़बूत बणायो जा सके है। उपमुख्यमंत्री वठे लगायी ज्यी प्रदर्शनी ने निरखी अर छपाई अर पैकेजिंग री नुवी तकनीकां री जाणकारी लीनी। वे नौजवानां अर स्टार्टअप्स ने ई हलका मांय आगे आवण सारु कह्यो।

भारत री चाय री गुणवत्ता अर इण रा स्वास्थ्य ने व्हेवण वाळा फायदां रा बारा मांय जाग जगावण सारु आज जयपुर मांय 'इंडिया टी वॉकथॉन' राख्यी ज्यी। वाणिज्य अर उद्योग मंत्रालय रे अधीन चाय बोर्ड री ओर ऊं राख्यी ज्यी ई वॉकथॉन ने संवारे साढे सात बज्यां पत्रिका गेट ऊं हरी झंडी बता र रवाना करी ज्यी। कार्यक्रम री एक्जीक्यूटिव अरुणिका पुकन बतायो के ई कार्यक्रम रो मकसद जनता ने देशी चाय री भांत-भांत री किस्मां अर वां री शुद्धता रा बारा मांय जाणकारी देवणो है।

राजस्थान हाउसिंग बोर्ड री 'समृद्धि अपार्टमेंट योजना' ने स्कॉच गोल्ड अवार्ड ऊं नवाज़ी ज्यी है। आवासन आयुक्त डॉ. रश्मि शर्मा आज नई दिल्ली मांय राख्यी ज्यो एक जळसा मांय ओ ईनाम लीनो। ई मौके वे कह्यो के ई योजना रा तैत बेहतर गुणवत्ता वाळा फ्लैट्स कम कीमत माथे जनता ने मुहैया करायी ज्यो है। ध्यानजोग है के लारला दिनां नगरीय विकास अर आवासन मंत्री झाबर सिंह खर्रा ई परियोजना रा 159 आवंटियां ने अलॉटमेंट लेटर दीना हा। आवासन आयुक्त कह्यो के मण्डल अब नुवी तकनीक अर जनता ने सुबीता मुहैया करावण माथे खास ध्यान दे रह्यो है।

राज्यपाल हरिभाऊ बागड़े विद्यार्थियां ऊं भारत री जूनी ज्ञान परम्परा ऊं जुड़ र देश रो मान बधावण बाबत् कह्यो है। वे आज सीकर मांय पंडित दीनदयाल उपाध्याय शेखावाटी विश्वविद्यालय रा छठा दीक्षांत समारोह मांय बोल रह्यो हा। ई मौके राज्यपाल कह्यो के नुवी शिक्षा नीति रे जरिए भणार्ई-लिखाई ने बेहतरिन बणावण री कोशिश करी जा रही है।

वे तालीम ने गरीबी दूर करण अर सामाजिक बदलाव रो सब ऊं मजबूत ज़रियो बतायो। श्री बागड़े कह्यो के दीक्षांत समारोह भणार्ई-लिखाई रो अंत नहीं, बल्कि जिन्दगी री नुवी सुरुआत है। वे नौजवानां ऊं तालीम देश रा विकास अर जनता रा भला सारु करण री अपील कीनी। राज्यपाल विश्वविद्यालय मांय 'प्रेरणा स्थल', अनुसंधान केंद्र अर हाथ री कारीगरी ऊं बणायी ज्यो सामान री प्रदर्शनी रो उद्घाटन ई कीनो।

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय काल विचार बतावेला। आ ई कार्यक्रम री 132वीं कड़ी व्हेला। मन की बात कार्यक्रम संवारे 11 बज्यां आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ओ कार्यक्रम आकाशवाणी समाचार री वेबसाइट, न्यूज़ ऑन ए.आई.आर. मोबाइल एप अर एआईआर न्यूज़, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यूट्यूब चैनलां माथे ई प्रसारित कर्यो जावेला।

आज अर्थ ऑवर डे मणायो जा रह्यो है। ई रा तैत दुनियाभर मांय एक घंटा ताई गैर-ज़रूरी लाइटां बंद कर र बिजली बचावण रो संदेश दियो जावे है। ई मौके आज रात साढे आठ ऊं साढे 9 बज्यां ताई बिजली री खपत कम करण सारु गैर-ज़रूरी लाइटां बंद राख्यी जावेला। इण रो मकसद बिजली रा महत्त्व अर पर्यावरण री हिफाजत रा बारा मांय जाग जगावणो है। राज्यपाल हरिभाऊ बागड़े बिजली बचावण री पहल करता थकां जनता ऊं अर्थ ऑवर डे मांय भागीदारी निभावण री अपील कीनी है।

श्रीगंगानगर ज़िला रा गंगनहर हलका मांय सिंचाई शुल्क री बाकियात वाळा 318 किसानां री पाणी री बारी बंद कर दीरीजी है। एस.ई. धीरज चावला आ जाणकारी दीनी। वे बतायो के सिंचाई शुल्क री वसूली रा काम मांय लापरवाही करण रा आरोप मांय 69 प्रबंध समितियां ने नोटिस ई दिया ज्यो है। सगळा बकायादार किसानां ऊं बाकियात री रकम काल ताई जमा करा देवण री अपील करीजी है।

चित्तौड़गढ़ ज़िला मांय अफीम री तुलाई रो काम काल सुरु व्हेला। नारकोटिक्स विभाग रे मुजब चित्तौड़गढ़ रा पहला खंड मांय काल जद के दूजा अर तीजा खण्ड मांय ओ काम दो अप्रैल ऊं सुरु व्हेला। राज्य मांय अमल री साख लेवण वाळा उनसठ हजार ऊं बत्ता किसानां री साखां रो तोल कर्यो जावेला। चित्तौड़गढ़ ज़िलो अमल री उपज लेवण रा इक्कीस हजार ऊं बत्ता लाइसेंस सागे प्रदेश मांय अव्वल है।

आईपीएल क्रिकेट रो 19वां संस्करण आज बेंगलुरु मांय सुरु व्हे रह्यो है। उद्घाटन मैच सिंज्यां साढे सात बज्यां एम. चिन्नास्वामी स्टेडियम मांय मौजूदा चैंपियन रॉयल चैलेंजर्स बेंगलुरु अर सनराइजर्स हैदराबाद बीच खेल्यो जावेला। ओ टूर्नामेंट 31 मई ताई चालेला।

भीलवाड़ा रा पुलिस लाइन मैदान मांय आज अजमेर रेंज स्तर री पुलिस खेलकूद होड़ सुरु व्ही। अतिरिक्त पुलिस महानिदेशक रूपेन्द्र सिंह इण रो उद्घाटन कीनो। ई मौके एडीजी खिलाड़ियां ने

संबोधित करता थकां कहयो के तमगा सीमित व्हे सके है, पण खिलाड़ियां ने जीत ऊं आगे विकास अर खेल भावना माथे ध्यान देवणो चाहिजे। वे खेलां ने टीम भावना अर अनुशासन बधावण रो मज़बूत ज़रियो बतायो।

.....  
 बालोतरा ज़िलो सब ऊं बत्ती ग्राम पंचायतां मांय टी.बी. री बीमारी जड़ ऊं खत्म करण वाळो बण ग्यो है। विश्व क्षय रोग दिवस रे मौके जयपुर मांय राख्यी ज्या राज्य स्तर रा कार्यक्रम मांय ई सारू ज़िला क्षय रोग अधिकारी डॉ. संदीप कुमार देवात ने ईनाम दे र नवाज़ी ज्या। कार्यक्रम मांय स्वास्थ्य अहलकारां अर जाणकारां री मौजूदगी मांय बालोतरा ज़िला रा इण ऊं जुड़्या कामां री जाणकारी दीरीजी।

डाक विभाग क्लिक एण्ड बुक सेवा सरू कीनी है। ई रा तैत घर बैढ्यां ही स्पीड पोस्ट अर पार्सल बुक कर्या जा सकेला। नुवी व्यवस्था रे मुजब 500 रूप्या ऊं बत्ती फीस वाळा पार्सल घर ऊं मुफ्त लिया जावेला, जद के 500 रूप्या ऊं कम फीस वाळा पार्सल माथे 50 रूप्या पिकअप शुल्क देवणो व्हेला।

उत्तर-पश्चिम रेलवे जोधपुर-दिल्लीकेंट-जोधपुर वंदे भारत एक्सप्रेस गाड़ी रो काल ऊं गांधीनगर जयपुर रेलवे टेशन माथे ठहराव रो फ़ैसलो कीनो है। रोड़वेज़ ई एक अप्रैल ऊं जैसलमेर ऊं बाड़मेर, जोधपुर अर अजमेर बीचे नुवी बसां चलावेला।